

女
科
輯
要
上
要
上

堯封沈氏所著醫經讀傷寒論讀簡明切當兄爲善
本尚有女科輯要一書世罕傳本原稿爲余外舅徐
虹橋先生補注珍藏先生早歸道山余受室後得見
其書頗多人理深談發前人所未發者今年楊素園
明府聞有此稿命爲借鈔余謂婦兄友珊曰君子之
孝也亦務其大者遠者而已寶守遺編莫若傳諸不
朽友珊許焉爰不揣鄙俚稍加參訂而公諸世云
道光庚戌仲冬棘人王士雄書于潛齋



女科輯要目次

卷上

經水

崩漏

帶下

求子

受胎

辨胎

妊娠諸病

附妊娠藥禁



附泰西諸說

卷下

產

產後諸病

乳證

雜病

諸方

女科輯要卷上

壻王士雄孟英參

沈堯封先生輯

錢塘後學徐政杰藹輝補注

男之藩友珊校

經水

素問女子七歲腎氣盛齒更髮長二七而天癸至任脈通太衝脈盛月事以時下

沈按天癸是女精由任脈而來月事是經血由太衝而來經言二七而天癸至緣任脈通斯時太衝脈盛月事亦以時下一順言之逆言之耳故月

事不調不來及崩。是血病。咎在衝脈。衝脈隸陽明。
帶下是精病。咎在任脈。任脈隸少陰。蓋身前中央
一條是任脈。背後脊裡一條是督脈。皆起於前後
兩陰之交。會陰穴。難經明晰。靈素傳誤。帶脈起于
季脇。似束帶狀。人精藏於腎。腎繫於腰背。精欲下
泄。必由帶脈而前。然後從任脈而下。故經言任脈
爲病。女子帶下。

雄按。俞東扶云。經言男子二八而腎氣盛。天癸至。
精氣溢瀉。若天癸卽月水。丈夫有之乎。蓋男女皆
有精。易謂男女構精可據。然指天癸爲精亦不妥。

天癸爲精。不當又云精氣溢瀉矣。後賢講受孕之道。有陽精陰血。先至後衝等說。亦謬。夫男女交接。曾見女人有血出耶。交接出血。是病。豈能裹精及爲精所裹哉。大約兩精歡暢。百脈齊到。天癸與男女之精偕至。斯入任脈而成胎耳。男胎女胎。則由夫婦之天癸。有強弱盈虛之不同也。吾友徐亞枝云。如沈氏說。一若天癸卽精者。如俞氏說。一若血與精之外。別有一物。所謂天癸者。竊謂天癸者。指腎水本體而言。癸者水也。腎爲水臟。天一生水。故謂腎水爲天癸。至謂至極也。猶言足也。女子二七。

男子二八腎氣始盛而腎水乃足。蓋人身五臟屬五行。惟腎生最先而腎足最遲。腎衰最早。故孩提能悲能喜能怒能思而絕無慾念。其有情竇早開者。亦在腎氣將盛。天癸將至之年。可見腎氣未盛。癸水未足。則不生慾念也。迨腎氣衰。癸水絕。則慾念自除矣。解此段經文者。當云女子必二七而腎水之本體充足。任脈乃通。太衝之脈始盛。月事因而時下矣。夫前陰二竅。溺之由水竅者。無論矣。其由精竅者。皆原于天癸者也。月水雖從衝脈下。謂爲天癸之常可也。洩精成孕。是任脈之施受。謂爲

天癸之能可也。帶下乃任脈之失擔任。謂爲天癸之病可也。然則稱月水爲天癸。似亦無不可也。前賢解此。皆重讀上二字。而略下一字。惟將至字當作來字看。遂至議論紛紜耳。

王冰曰。男以氣運。故陽氣應日而一舉。女以血滿。故陰血從月而一下。

月事不調

素問。天地溫和。則經水安靜。天寒地凍。則經水凝泣。天暑地熱。則經水沸溢。卒風暴起。則經水波湧而隴起。

褚澄曰女子天癸既至。踰十年無男子合。則不調。未
踰十年思男子合。亦不調。不調則舊血不出。新血誤
行。或漬而入骨。或變而爲腫。或雖合而難子。合多則
慙枯虛人。產乳眾則血枯殺人。

雄按此論甚不盡然。存其意可也。惟產乳眾而血
枯卒死者頗多。然吾鄉吳醞香大令徐夫人。半產
三次。不計外。凡生十男四女。竝已長成。而夫人年
踰五旬。精力不衰。猶能操家政。而撫馭羣下也。
方約之云。婦人不得自專。每多忿怒。氣結則血亦結。
雄按此至言也。氣爲血帥。故調經必先理氣。然理

氣不可徒以香燥也。蓋鬱怒爲情志之火。頻服香燥。則營陰愈耗矣。

趙養葵云。經水不及期而來者。有火也。宜六味丸滋水。如不及期而來多者。加白芍柴胡海螵蛸。如半月或十日而來。且縣延不止者。屬氣虛。宜補中湯。如過期而來者。火衰也。六味加艾葉。如脈遲而色淡者。加桂。此其大略也。其間有不及期而無火者。有過期而有火者。不可拘於一定。當察脈視稟。滋水爲主。隨證加減。

雄按婦人之病。雖以調經爲先。第人秉不同。亦如

其面有終身月汛不齊而善於生育者有經期極準而竟不受孕者雄於女科閱歷多年見聞不少始知古人之論不可盡泥无妄之藥不可妄試也

辨色及痛

趙養葵曰衝任藏精系胞又恃一點命門之火爲之主宰火旺則紅火衰則淡火太旺則紫火太衰則白所以滋水更當養火甚有乾枯不通者雖曰火盛之極亦不宜以苦寒之藥降火祇宜大補其水從天一之源以養之使滿又曰紫與黑色者多屬火旺亦有虛寒而黑色者不可不察若淡白則無火明矣

沈按王宇泰以寒則凝。既行而紫黑。定非寒證。然
投熱藥取效。十中嘗見一二。色白無火。亦屬近理。
然間有不宜補火者。嘗見元和一婦。經水過期十
日方至。色淡。穩婆據此。投肉桂藥數劑。經水過多。
遍身發黃。不能飲食。身熱脈數。竟成危候。此是丹
溪所謂經水淡白。屬氣虛一證。要之臨診時。須細
察脈象。復參旁證。方識虛實寒熱。儻有疑似證中
有兩說者。先用其輕劑。如色淡一證。先用補氣法。
不效。再投補火。庶無差誤。錄葉氏辨證于左。

葉氏曰。血黑屬熱。此其常也。亦有風寒外乘者。十中

嘗見一二蓋寒主收引。小腹必常冷痛。經行時或手足厥冷。唇青面白。尺脈遲。或微而虛。或大而無力。熱則尺脈洪數。或實有力。參之脈證爲的。

雄按色淡。竟有屬熱者。古人從未道及。須以脈證互勘自得。但不可作實熱論。而瀉以苦寒也。更有奇者。方氏婦產後。經色漸淡。數年後竟無赤色。且亦結塊。平時亦無帶下。人曰疴羸。余診之。脈更數口苦。而時有寒熱。與青蒿白微黃檗柴胡當歸鼈甲龜板芍藥烏鰂枸杞地骨皮等藥出入爲方。服百劑而愈。此僅見之證矣。

滑伯仁曰經前臍腹絞痛寒熱交作下如黑豆汁兩尺脈濇餘皆弦急此寒溼搏於衝任寒溼生濁下如豆汁與血交爭故痛宜辛散苦溫血藥

杰按辛散血藥是川芎之類苦溫血藥是艾葉之類

李氏曰經水帶黃混濁者溼痰也

丹溪曰經將行而痛者氣之滯也用香附青皮桃仁黃連或用抑氣散四物加胡索丹皮條芩又曰經將來腹中陣痛乍作乍止者血熱氣實也四物加川連丹皮

杰按抑氣散出嚴氏。係香附四兩。陳皮一兩。茯苓
炙甘草兩半也。爲末。每服二錢。治婦人氣盛於血。
變生諸證。頭暈膈滿。取內經高者抑之之義。汪昂
謂是方和平可用。若補血以平陽火。亦正治也。

又經後作痛者。氣血俱虛也。宜八珍湯。
又成塊者。氣之凝也。

沈按經前腹痛。必有所滯。氣滯脈必沉。寒滯脈必
緊。溼滯脈必濡。兼寒兼熱。當參旁證。至若風邪由
下部而入于脈中。亦能作痛。其脈乍太乍小。有時
隴起。葉氏用防風。荆芥。桔梗。甘草。虛者加人參。各

壹錢焙黑。取其八皿分。研末酒送神效。

又按經前後俱痛。病多由肝經。而其中更有不同。脈弦細者。是木氣之鬱。宜逍遙散及川楝小茴橘核之類。脈太者。是肝風內動。體發紅塊者。是肝陽外越。俱宜溫潤。戴禮亭室人向患經前後腹痛。連及右足。體發紅塊。脈大。右關尺尤甚。己卯秋。予作肝風內動治。用生地四錢。炒枸杞一錢。細石斛二錢。杜仲二錢。乾淡薤蓉一錢。麥冬一錢。牛膝一錢。歸身一錢五分。炒白芍一錢。服之痛止。後於經前後數劑。經來甚適。不服卽痛。因作丸服。此方屢